

दिनांक 05.05.2024

समय: 18.50 बजे

आकाशवाणी जयपुर-अजमेर

प्रादेशिक समाचार..

- राज्य सरकार प्रदेश मांय अवैध खनन, परिवहन अर भण्डारण माथे प्रभावी कार्रवाई अर समन्वय खातिर जिला कलेक्टरां ने हुकम जारी कर्या।
- प्रदेश में न्यारा-न्यारा सड़क हादसां मांय 11 जणा री मौत।
- संत श्री सेन महाराज री जयंती आज-प्रदेश मांय न्यारी-न्यारी ठौड़ां माथे धार्मिक कार्यक्रमां अर शोभाजात्रावां रो आयोजन।

अर

- राज्य मांय आवता दो दिनां तापमान मांय 2 सुं 3 डिग्री सैल्सियस ताई बधोतरी होणे री आस।

000

राज्य सरकार प्रदेश मांय अवैध खनन, परिवहन अर भण्डारण माथे प्रभावी कार्यवाही अर समन्वय खातिर जिला कलेक्टरां ने हुकम जारी कर्या। उद्योग और खान मेहकमां रा प्रमुख शासन सचिव अजिताभ शर्मा सगळां कलेक्टरां ने पानो लिख र अवैध खनन गतिविधियां रे खिलाफ कार्यवाही, संबंधित मेहकमां रे बीच तालमेल अर मार्गदर्शन खातिर जिला स्तरीय कमेटी री तुरंत बैठक राखणे खातिर भी कहयो है। वणा कहयो की अवैध खनन गतिविधियां माथे प्रभावी कार्यवाही अर समन्वय खातिर जिला कलेक्टर री अध्यक्षता मांय कमेटी बणयोडी है। इण रे साथै ही जिला कलेक्टरां ने बजरी रे अवैध खनन, परिवहन अर भण्डारण माथे कार्यवाही खातिर **एसआईटी गठित** करणे रे वास्ते भी अधिकृत कर्यो ग्यो है। श्री शर्मा जिला कलेक्टरां ने जिला स्तरीय कमेटी री बैठक री कार्यवाही विवरण राज्य सरकार ने भेजणे अर नियमित बैठक राखणे रा हुकम दिया है। वणा जयपुर अर जोधपुर पुलिस कमिश्नर अर सगळा पुलिस अधीक्षकां ने भी पानो लिख र अवैध खनन गतिविधियां माथे कार्यवाही मांय समन्वय व सहयोग करणे रो लिख्यो है। श्री शर्मा बतायो कि खान मेहकमां कानी सुं खनन खेतरां मांय बजरी रे

अवैध खनन, परिवहन अर भण्डारण री शिकायतां ने ध्यान मांय राखता थकां अभियान चला र कार्यवाही करी जा रही है। वणा बतायो की मेहकमो 130 प्रकरण दर्ज कर एक गिरफ्तारी अर 16 एफआईआर दर्ज कराई है।

000

मुख्य निर्वाचन आयुक्त् राजीव कुमार आज नुवी दिल्ली मांय 75 अंतरराष्ट्रीय प्रतिनिधियां ने लोकसभा चुणाव रा न्यारा-न्यारा पहलुआं री जाणकारी दी। वणा 23 देशां रा चुणाव प्रबन्धन निकायां रा प्रतिनिधियां ने संबोधित भी कर्यो। आं प्रतिनिधियां ने निर्वाचन आयोग लोकतंत्र रा महापर्व रे जायजे खातिर आमंत्रित कर्यो है। ऐ प्रतिनिधि छह प्रदेशां महाराष्ट्र, गोवा, गुजरात, कर्नाटक, मध्यप्रदेश अर उत्तरप्रदेश री केई लोकसभा सीटां रो दौरा करेला। वाणो ओ कार्यक्रम इण म्हीने री नौ तारीख ने पूरो व्हेला।

000

केंद्र सरकार प्याज रे निर्यात माथे प्रतिबंध हटा दियो है। विदेश व्यापार महानिदेशालय एक अधिसूचना मांय कह्यो है कि न्यूनतम निर्यात मूल्य पांच सौ पचास डॉलर प्रति मिट्रिक टन रे साथे ओ आदेश तत्काल प्रभाव सुं लागू व्हेग्यो है। इण बरस रबी फसलां रे अनुमानित चौखे उत्पादन अर सामान्य सुं बत्ती मानसून रे पूर्वानुमान रे साथै खरीफ फसलां री चौखी खरीद बाजारी री मौजूदा स्थिति अर प्याज री अंतरराष्ट्रीय उपलब्धता जेडा तथ्यां ने ध्यान मांय राखता व्ह्या ओ फैसलो कर्यो ग्यो है।

000

केंद्र सरकार साफ कर्यो है की खाद्य पदार्था खातिर काम मे लेवण वाळां कीटनाशकां री मात्रा रे संबंध मांय भारत रा मानदंड वैश्विक स्तर रा है अर न्यारा-न्यारा खाद्य पदार्था खातिर न्यारी-न्यारी मात्रा मांय कीटनाशकां रो उपयोग कर्यो जावे है।

कृषि मंत्रालय इण बारा मांय एक बयान जारी कर मीडिया री खबरां ने तथ्यहीन अर दुर्भावनापूर्ण बतायो है। मीडिया री खबरां मांय दावो कर्यो ग्यो हो की **भारतीय खाद्य सुरक्षा अर मानक प्राधिकरण** जड़ी-बूटियां अर मसालां मांय दस गुणा ताई कीटनाशकां रा उपयोग री अनुमति देवे है। कृषि मंत्रालय री **केंद्रीय कीटनाशक बोर्ड अर पंजीकरण समिति** कीटनाशकां रे विनियमन करे है। इण समिति मांय 295 सुं बत्ती कीटनाशक

पंजीकृत है। मसालां मांय उपयोग रे खातिर एक सौ 39 कीटनाशक पंजीकृत है। कृषि मंत्रालय कह्यो है कि कीटनाशकां रो अनुपात ने वैज्ञानिक विश्लेषण रे आधार माथे लगोतार संशोधित कर्यो जावे है।

000

प्रदेश मांय न्यारा—न्यारा सड़क हादसां मांय 11 जणा री मौत व्हेग्यी अर 14 जणा घायल व्हेग्या। सवाईमाधोपुर जिला रा **बाँली** थाना खेतर मांय **दिल्ली—मुंबई एक्सप्रेस** वे माथे आज सुवांरे सड़क हादसा मांय छह जणा री मौत व्हेग्यी। मरण आळा मांय तीन महिलावां अर तीन मोटेयार भेळा है। हादसा मांय दो टाबर घायल व्हेग्या है। कार सवार ऐ सगळा जणा एक ही पिरवार रा सदस्य हा। पुलिस रे मुजब सीकर सुं ऐ सगळां कार सुं रणथंभौर थापित त्रिनेत्र गणेश मंदिर दर्शन करणे जा रह्या हा। इण रे चालता बनास पुलियां रे कने दुर्घटना व्हेग्यी। **बाँली** थाना अधिकारी धर्मपाल बतायो कि दुर्घटना मांय कार बुरी तरह क्षतिग्रस्त व्हेगी। शवां ने घणी मशकत रे पाछे बारे निकाळयो ग्यो।

हादसा मांय घायल टाबरा ने पैल्या **बाँली** रा सामुदायिक स्वास्थ्य केंद्र मांय भर्ती करायो गयो हो, जठे सुं वां ने जयपुर रैफर कर दियो। वठिने दूजे सड़क हादसो श्रीगंगानगर जिले रा रिडमलसर रे कने व्हयो जठे कार अर 2 मोटरसाईकिलां री टक्कर मांय बाप—बेटा री मौत व्हे ग्यी। इण हादसा मांय 6 जणा घायल व्हेग्या। घायलां ने प्राथमिक उपचार रे पाछे श्रीगंगानगर जिला सफाखाना रेफर कर्यो ग्यो। कोटपूतली बहरोड़ रे बानसूर उपखण्ड खेतर रे नारायणपुर रे कने एक बेकाबू कार पलटणे सुं दो मोटयारां री मौत व्हेग्यी। इण हादसां मांय चार युवक घायल व्हेग्या। वठिने एक दूजे सड़क हादसा मांय बूंदी जिला रा लाखेरी खेतर मांय ट्रक री टक्कर सुं मोटरसाईकिल सवार री मौत व्हेग्यी। इण हादसा मांय मोटरसाईकिल सवार एक दूजो जणो भी घायल व्हेग्यो। हादसे रे पाछे नाराज लोगां प्रदर्शन कर र राजमार्ग ने बाधित कर्यो। करीब 5 घंटा पाछे पुलिस प्रशासन समझाइश करन प्रदर्शनकारियां ने हटायो। इण रे पाछे यातायात सामान्य हो गयो।

000  
ब्रेक

जयपुर रा **राष्ट्रीय आयुर्वेद संस्थान** मांय **वर्ल्ड हैंड हाइजीन डे** रे मौके माथे आज न्यारी—न्यारी जागरूकता गतिविधियां रो आयोजन कर्यो गयो। इण मौके माथे गंदां हाथां सुं होवण वाळा संक्रामक रोगां ने रोकण खातिर बैनर पोस्टर रे माध्यम सुं **जागरूकता** गतिविधियां आयोजित करीजी।

इण मौके माथे कुलपति प्रोफेसर संजीव शर्मा कह्यो की स्वस्थ अर निरोगी रहणे खातिर आपरी री साफ—सफाई अर हाथां रो साफ होणो बहुत जरूरी है, हाथां रे साफ नी होणे पर शरीर मांय कई रोग होणे री आशंका रहवे है। **अस्पताल उपाधीक्षक डॉ. हरीश भाकुनी** कह्यो **विश्व स्वास्थ्य संगठन** भी संक्रमणां सुं बचाव खातिर हाथ धोणे रे महतव माथे जोर दियो है।

-----  
000

अंतर्राष्ट्रीय हास्य दिवस माथे आज प्रदेश मांय न्यारी—न्यारी जगवां माथे कार्यक्रम राख्खी ज्या। जयपुर रा मानसरोवर थापित सिटी पार्क मांय **हास्य होड** राखीजी। लोगा ने हसणे, मुस्कुराणे अर खुश रहणे खातिर प्रेरित कर्यो ग्यो। जयपुर ग्रेटर नगर निगम री महापौर सौम्या गुर्जर साथे केई गणमान्य लोगां इण कार्यक्रम मांय शिरकत करी। इण मौके माथे सेंट्रल पार्क मांय भी हास्य आधारित कार्यक्रम राखीज्या। इण मांय जयपुर रां कई नामी हास्य कलाकार लोगां ने जम र हंसायो। कार्यक्रम रा मुख्य अतिथि विधायक बालमुकुन्द आचार्य कह्यो की जिंदगी ने आप ने हंसते व्ह्या अर चौखे तरीके सुं जीणो चाहिजे।

000

संत श्री सेन महाराज री जयंती रे मौके माथे आज प्रदेश मांय न्यारी—न्यारी जगवां माथे धार्मिक कार्यक्रम राख्या जा रह्या है। केकडी मांय सेन जयंती रे मौके माथे शोभाजात्रा निकाळी ज्यी। आं जात्रा शहर रे खास गेला सुं होवती व्ही निकळी।

शोभायात्रा मांय घणी तादाद मांय सेन समाज रा लोगां भागीदारी करी। वठिने टोंक जिला मांय भी सेन जयंती माथे केई कार्यक्रम राखीज्या। टोंक मांय **कंकाली माता मन्दिर सुं** सेन महाराज री सोवणी शोभाजात्रा निकाळीजी। इण मांय बडी तादाद मांय

लोग भेळा व्हीया। भरतपुर मांय भी सेन महाराज री जयंती धार्मिक उच्छास सुं मनायी ज्यी। इण मौके माथे शहर मांय शोभाजात्रा निकाळी जी।

000

प्रदेश मांय घणखर ठौड़ां माथे तापमान मांय बधोतरी होणे सुं गर्मी रो असर बध ग्यो है। लारला 24 घंटां मांय राज्य मांय कई जगावां माथे पारो 40 डिग्री सैल्सियस रे पार पहुच्यो। राज्य मांय सब सु बत्ती 42 दशमलव 7 डिग्री सेल्सियस बत्ती ऊं बत्ती तापमान पिलाणी मांय दर्ज करी ज्यो। चूरू, अजमेर अर भीलवाड़ा मांय आज दिन मांय तेज गर्मी रे असर सुं जनजीवन प्रभावित व्ह्यो। वठिने टोंक मांय दोपहरां से बगत बाजारां मांय लोगां री आवाजावी कम री। मौसम केन्द्र जयपुर निदेशक राधेश्याम शर्मा बतायो कि प्रदेश री घणखर ठौड़ां माथे आगले दो दिन मांय तापमान मांय 2 सुं 3 डिग्री सैल्सियस री बधोतरी होवण री आस है।

-----  
000

चिकित्सा स्नातक पाठ्यक्रमां मांय दाखिले खातिर **राष्ट्रीय पात्रता-सह-प्रवेश परीक्षा-एनईईटी** आज आयोजित करीजी। देश भर रा पांच सौ सत्तावन शहरां अर विदेश रा 14 शहरां मांय 24 लाख सुं बत्ती पढेसऱ्या रे इण परीक्षा मांय भेळा होणे री आस है। कोटा मांय **नेशनल टेस्टिंग एजेंसी** री कानी सुं 56 परीक्षा केंद्रां माथे करीब 28 हजार अभ्यर्थी पंजीकृत है। आज परीक्षा केन्द्रां मांय प्रवेश सुं पैल्या टाबरां ने नियमां री जाणकारी दीरीजी। परीक्षा ने ले र सुरक्षा रा चौखा बंदोबस्त कऱ्या गया।

000

राज्यपाल कलराज मिश्र इस्कॉन इंडिया री गवर्निंग काउंसिल रा अध्यक्ष श्री गोपाल कृष्ण गोस्वामीजी रा निधन माथे घणो दुख जतायो। श्री मिश्र आप रे संदेश मांय कह्यो की दुनिया भर मांय दर्जनां मिंदरा अर सांस्कृतिक केंद्रां रे निर्माण रे काम मांय वाणो योगदान सनातन भारतीय संस्कृति री अनुपम देन है। वाणो निधन अपूरणीय क्षति है।

000

राजस्व मंडल अध्यक्ष राजेश्वर सिंह रा निर्देशानुसार आयोजित करी जा रही इण होड मांय राजस्थान राज्य रा भारतीय प्रशासनिक सेवा रा अहलकार, राजस्थान प्रशासनिक सेवा अहलकार, राजस्व अधिकारी व कर्मचारी, अधिवक्ता अर आमजन इण श्रेणी मांय हिस्सो ले सके है। हिन्दी अर अंग्रेजी मांय भेज्या जावण वाळा निबंध खातिर अधिकतम शब्द सीमा एक हजार तैय करीजी है।

राजस्व मंडल रा निबंधक महावीर प्रसाद बतायो कि चुणयोडा प्रतिभागियां ने राजस्व मंडल री कानी सुं राख्या जावण वाळा राज्य स्तरीय सम्मान जळसा मांय प्रमाण पत्र अर स्मृति चिन्ह प्रदान कर सम्मानित कर्यो जावेला।